



Bentiaraq Ottosen

UPA 2026/120

Atassut

18. Maj 2026

**Inuiattut erinarsuutitsinni marluusuni sorleq pisortatigoortumik atorneqassanersoq nutaamilluunniit taarserneqartariaqarnersoq pillugu apeqquteqaat aallaavingalugu oqallinnissamik siunnersuut.**

(Inatsisartunut ilaasortaq, Aqqalu C Jerimiassen, Atassut)

Atassummiit siullermik qutsavigiumavarput Aqqalu C. Jerimiassen apeqquteqaat aallaavingalugu oqallinnissamik siunnersuuteqarneranut pingaarutilimmut.

Ilisimavarput nunaqqatitta ilaasa qulequtaq una oqaluuserineqassatillugu allaninggaanniit pingaaruteqannginnerusutut nalilersortaraat, unammilligassangut inuiaqatigiittut annertusarmata allarpassuit. Atassummiilli naqissuserumavarput piorsarsimassuserput naleqartittuaannassagatsigu pingaartillugulu. Imami isumaqartigaaq piorsarsimassuserput toqqammaviuvoq inuiattut kinaassuseqarnitsinnut.

Naalakkersuisut akissuteqarneranni soorlu takuneqarsinnaasoq aamma ullumikkut ima inissisimasugut, marlunnik inuiattut erinarsuuteqarluta pisortatigoortumik sorliussanersoq aalajangerneqarnikuunngitsumik. Taamannak ersernerluttoqarnerata allaanngilaq inuiaqatigiittut tarrarsortittaraatigut takutinniarluta maannakkumut qanoq inissisimanersugut, aalajangertariaqartugut.

Eqqumiitsuliorneq piorsarsimassuserlu ulluinnarni avissaarsimasuunngillat, ataatsimoornerput ilusilersortarpaat, immitsinnut qanoq paasisarnerput aammalu nunarsuarmioqataanitsinni takutitsisarnerput. Pingaaruteqarpoq taamaamat Nunatta piffissanngorpat aalajangerumaarnissaa inuiattut erinarsuut sorleq sinnerluta ilisarnaataalerumaassanersoq.

Ataqqinartut Henrik Lundiungaluaq aammalu Jonathan Peterseniungaluaq eqqumiitsuliornikkut Nunatta oqaluttuarisaanerani pingaaruteqaqisut ilagaat. Erinaq sorlerluunniit toqqarneqassangaluarpat tunissutigisimaat akornatsinniittuassapput piorsarsimassutsikkut erigisatut kingornussaallutik.

Isumaqaataavugut inuiaqatigiinni peqataatsineq pingaaruteqarluinnarumaartooq. Isumaqanngilagulli politikikkut ingerlatsinikkut aalajangerneriinnakkullu taamaallaat ingerlanneqassasoq, eqqumiitsuliornermiippoq aammalu piorsarsimassutsip iluani ingerlatassaalluni.



Taamaammat Atassummiit innersuussutigaarput Naalakkersuisut misissuitinneqarsinnaanerak periarfissanik ataatsimiititaliortoqarsinnaanerak imaluunniit Komitétut ittumik eqqumiitsuliortunik piorsarsimassutsikkullu attuumassutilinnik paasisimasaqarluartunik inuttalersuisoqarsinnaanerak. Taamannak aaqqissuussamik inuttalersuilluni sulisitsinerup ilisimasatigut toqqammaveqarluni naliliisoqarnissaanut siunissami ataqqinnittumik innersuussuteqarsinnaaneq toqqammavissaqalersissinnaavaa.

Atassummiit ullumikkuinnarmut eqqarsaateqanngilagut, siunissarput eqqarsaatigaarput. Inuiattut erinarsuuterput kinguaassatsinnut ingerlaqqittussaavoq, meeqqatta aammalu taakku kinguaassaasa tusartangassaraat kinaassutsiminnullu attuumassuteqartittussaassallugu. Taamaammat aalajangerneq isumaliuutigilluangaasariaqarpoq oqaluttuarisaanitsinnut aammalu siunissatsinnut ataqqinnittuulluni.

Taamatut Atassummiit oqaaseqaateqarluta oqallilluarnissassinnik kissaappatsigit.